

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 2 DISEMBER 2020 (RABU)

SOALAN NO.44

Minta **PERDANA MENTERI** menyatakan dengan terperinci perancangan yang telah dan bakal dilaksanakan untuk mengaktifkan semula sektor perlombongan berorientasikan gas dan petroleum serta sektor pertanian berorientasikan kelapa sawit di negeri Sabah dan unjuran sumbangan Keluaran Dalam Negara Kasar (KDNK) kedua-dua sektor ini dari negeri ini kepada Malaysia bagi tahun ini.

JAWAPAN

**YB DATO' SRI MUSTAPA BIN MOHAMED,
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, ekonomi negeri Sabah dijangka menguncup pada tahun 2020, selari dengan penguncupan ekonomi Malaysia yang dijangka sebanyak 5.5% hingga 3.5%. Penguncupan ini disebabkan oleh pandemik COVID-19 yang masih berlarutan sehingga kini. Sektor perlombongan dan pertanian akan turut terjejas.
2. Untuk makluman Ahli Yang Berhormat, Kerajaan akan melaksanakan kajian Dasar Tenaga Negara atau *National Energy Policy* (NEP) dan Pelan Halatuju Gas Asli atau *Natural Gas Roadmap* (NGR) sebagai antara strategi sektor tenaga di dalam Rancangan Malaysia Keduabelas (RMKe-12).
3. Dasar Tenaga Negara ini merupakan dasar baharu yang komprehensif dan merupakan *umbrella policy* atau dasar induk yang akan menentukan dasar dan arah tuju strategik jangka masa panjang sektor tenaga negara. Dasar ini akan dijadikan panduan untuk menangani pelbagai isu merentas sektor yang menggunakan tenaga selain menggariskan langkah tindak balas kepada trend global mengenai peralihan tenaga.
4. Sementara itu, NGR merupakan *feeder policy* kepada NEP yang yang akan menggariskan peranan jangka panjang bahan api gas untuk sektor elektrik dan bukan elektrik. Ini termasuk aspek pembekalan dan permintaan masa hadapan (*supply and demand*) selain strategi untuk meningkatkan persaingan melalui kawal selia Akses Pihak Ketiga atau “*Third Party Access*” (TPA) dalam pasaran gas domestik kearah memastikan harga yang kompetitif. Harga gas yang kompetitif melalui persaingan yang adil akan menarik pelaburan di sektor huluan minyak dan gas dan seterusnya memastikan jaminan dan kemampunan bekalan tenaga jangka masa panjang negara.

5. Selain dasar peringkat nasional, PETRONAS dan Kerajaan Negeri Sabah juga telah bekerjasama untuk menghasilkan pelan induk gas sebagai usaha merancakkan lagi industri petroleum di negeri berkenaan.
6. Bagi menjamin kestabilan ekosistem dan dayasaing industri petroleum di negeri Sabah, PETRONAS sentiasa bersedia untuk bekerjasama dengan Kerajaan Negeri Sabah dalam membangunkan industri petroleum di Sabah bagi manfaat jangka masa panjang.
7. Bagi sektor pertanian berorientasikan kelapa sawit pula, Kerajaan sentiasa berusaha untuk memastikan kemampanan industri sawit termasuk di negeri Sabah. Pada tahun 2020, Kerajaan telah memperuntukkan sebanyak RM34.4juta kepada Lembaga Kemajuan Tanah Sabah (SLDB) dan RM12.1juta kepada FELCRA Berhad bagi pelaksanaan program pembangunan industri kelapa sawit di Sabah.
8. Antara program yang dilaksanakan untuk meningkatkan produktiviti dan kemampanan industri sawit adalah menaiktaraf infrastruktur ladang, program tanam semula sawit, pembangunan kawasan tanam baharu sawit dan penyatuan dan pemulihan tanah.
9. Selain itu, Kerajaan juga menyalurkan peruntukan untuk program aktiviti ekonomi tambahan kepada pekebun kecil sawit yang bertujuan untuk menjana pendapatan sampingan melalui ternakan dan diversifikasi tanaman. Inisiatif ini dijangka dapat memberi manfaat secara langsung kepada peneroka yang seterusnya akan dapat membantu meningkatkan taraf hidup mereka dan mengurangkan kebergantungan mereka kepada hasil kelapa sawit semata-mata.

Sekian, terima kasih.